

Come prin teme par movi i estris dai nestrìs Contecurtârs, o di chei che a àn voie di diventâlu, o sielzìn un argument che o vin doprât za l'an passât e che, a viodi dal numar di contis che nus jere rivât, al veve stiçât une vore lis tastieris.



O stin cjacarant de **gnot de vilie dal dì dai Sants**, chê che il mont plui *merecanizât* e consumistic al clame, cun buine pâs storiche e de tradizion, la gnot di **Halloween**.

Nô di Contecurte, tal dâus chest teme, i tignìn a marcâ che jenfri chei popui che a àn il drit di celebrâ cheste ricorence al è cence dubi chel dai Furlans.

Se o nin a viodi ce che al è daûr de **festivitât cristiane** che e cjape dentri ducj i Sants, o scuvierzìn che cheste date e je stade sielte par platâ une **ricorence dai popui di riunde celtiche**, che a vignivin ben prime dai romans e che a viodevin intal prin di Novembar l'inizi dal an.

Il 31 di Otubar, par chescj nestrìs antighissims vons, al rapresentave la vignude dal Princip dal scûr "**Samhain**", ven a stâi la fin de stagjon cjalde e il començâ di chê frede. Chest il motîf par che si diseve grazie, in chê gnot, a ce che si veve vût dilunc il an.

In bande di chest al jere però ancje **il cult dai muarts**. I Celts, di fat, a pensavin che in cheste gnot i spirits dai muarts a cirissin di tornâ indaûr a cjolisi une gnove anime, e par fâiu scjampâ a dopravin i stravistiments plui orents e a rindevin lis lôr cjasis fredis e inospitâls.

Ca di no, invece, 'nd è une vore di altris usancis, di spes ladis pierdudis, che a **ricuardin la gnot di Ognissants**. La plui cognossude e je di sigûr che de **coce di svuedâ e taiâ par fâi la musate**, come chê inte immagine che o vin metude, e che dopo e vignive lassade sul

barcon, cun dentri une cjandele impiade. Ma no si puès dismenteâsi, simpri in teme di muarts che a tornin, **la lûs di lassâ impiade fûr di cjase**, par che i parincj a cjatin subite la strade, o il puest in taule parecjât, magari cu lis cjastinis, par cui che al torne a cjatânus in cheste gnot, in procession, par che al cjati il bon acet (visantsi, stêt atents, di lassâ **un seglot di aghe**, che i muarts a àn simpri une vore di sêt).

A dimostrazion di dut ce che us vin pene dit, us visìn ancje di dutis **lis sagris e lis fiestis** che a vegnin inmaneadis in chescj dîs, ator pe nestre regjon.

Insome, nus pâr che lis ispirazions par scrivi cualchi buine conte di ande gotiche o tenebrose a no si sedin esauridis cun chês scrivudis l'an passât. Par chei che no jerin o che a àn voie di tornâ a leilis us ricuardin che a jerin: *Sium de vilie dai Sants, Il Pipinot, La procession e Picjâts*.

Se us è restade ancjemò cualchi idee... la direzion di pueste e je chêt ca: contecurte@gmail.com